

Istina o Mekkiju Turabiju

Posmatrajući današnju situaciju u svijetu, možemo primijetiti da se mnogi ljudi žale na psihička i duševna oboljenja. Razni stresovi, uznemirenosti, potištenosti, nemir u duši i tijelu, postali su, nažalost, jedna od karakteristika ovog vremena, zbog čega mnogi ljudi traže spas u odlascima raznim vračarima, gatarima, sihirbazima, bioenergičarima, tražeći od njih neko rješenje, čudo koje će jednostavno od njih otkloniti sve te probleme i kušnje.

Razlog njihovog odlaska može biti i njihovo neznanje, nepoznavanje suštine posla kojim se bave dotični prevaranti, ili jednostavno slabost imana – vjere u Jednog i Jedinog Gospodara i Tvorca, jedinog Znalca tajnog i skrivenog (gajba), onoga što je bilo i što jeste, Onoga koji jedini daje lijek i od bolesti štiti, koji nas je uputio na načine ispravnog liječenja, naredivši nam da slijedimo najodabranijeg čovjeka – Muhammeda, sallallahu alejhi ve sellem, koji nas je ostavio na čistoj stazi i jasnom putu, koji se jasno razlikuje od zablude.

U odlascima takozvanim iscjeliteljima i čudotvorcima, koji sve probleme rješavaju, krije se velika opasnost po vjerovanje iz jednostavnog razloga što to sadrži oslanjanje i vezivanje duše za nekoga drugog mimo Gospodara svjetova, Stvoritelja svega stvorenog, a istovremeno takvo postupanje predstavlja kršenje Poslanikovih, neka je na njega Allahov mir i spas, naredbi. Istina je da su se čuda dešavala poslanicima kao dokaz njihova poslanstva i njihove velike pobožnosti. Da je ovaj dar mogao imati obični čovjek, to ne bi bila nikakva mudžiza niti dokaz poslanstva, jer poslanstvo je zapečaćeno smrću posljednjeg Poslanika, koji nam je nagovijestio da poslije njega nema poslanika, ali da će se pojaviti veliki broj varalica i onih koji će sebi pripisivati čuda i poslanstvo.

Ovom prilikom želimo upozoriti naš narod na opasnost od raznih smutljivaca, prevaranata i sihirbaza, a posebno na osobu pod imenom Mekki Turabi koji ovih dana boravi u Sarajevu.

Naime, Mekki Turabi tvrdi da liječi od gotovo svih vrsta bolesti, što je bio dovoljan razlog da veliki broj ljudi svakodnevno odlazi kod njega, tražeći lijeka za svoje bolesti. Zbog obaveze koju imamo pred Uzvišenim Allahom i Njegovom čistom vjerom, dužni smo ukazati na sljedeće: Ko je taj čovjek, da li su njegove metode ispravne i prihvatljive u našem vjerovanju, i kakva se opasnost po našu vjeru krije u odlasku takvom čovjeku. Kako bismo razotkrili famu koja je nastala oko Turabija, navest ćemo neke od Mekkijevih tvrdnji koje su suprotne islamskom vjerovanju, a iza kojih se krije velika opasnost po muslimanski narod.

Mekki Turabi tvrdi da liječi metodom koja je danas poznata kao "bioenergija", odnosno dodirujući svojom rukom tuđi dio tijela prenosi svoju pozitivnu energiju na dotičnu bolesnu osobu. Svoju navodnu obdarenost smatra "Božijim darom", tvrdeći da energiju dobiva sa pet planeta, odnosno to nije energija iz naše dimenzije, već je to posebna vrsta energije koju samo on dobiva i bez koje, kako izjavljuje, ne bi bio u stanju da živi na ovom svijetu. Nadalje, Turabi tvrdi da tu energiju dobiva u samo jednom djeliću sekunde, iako je ta "planeta" udaljena od njega na milione svjetlosnih godina i uopće se ne nalazi u Sunčevom sistemu.

Posebna specifičnost u vezi sa ovim "iscjeliteljem" dolazi do izražaja u tvrdnji da može liječiti preko slike, jer dodirrom slike ta energija automatski utječe na oboljelu osobu.

Neke od osobina sihirbaza evidentne su upravo kod Mekkija Turabija. U vezi s tim nameću se sasvim logična pitanja: Kako to da Turabi zna šta je dotičnoj osobi, gdje je njeno bolno mjesto, kako zna da nije opsihrena, a nije osobu ni dodirnuo, niti mu je išta kazala?

Na ovo pitanje, islamski su učenjaci dali vrlo jasan i jednostavan odgovor: "Svaki čovjek ima svog karina – šejtana, koji je zadužen za njega, navraćajući ga na zlo, tako da taj njegov šejtan posjeduje znanje o njemu, jer je uz njega, zna šta radi, šta čini, od čega boluje i sl. Kada takva osoba ode sihirbazu – a ovdje Turabiju – Turabijev ili sihirbazov karin – šejtan dobije informacije nevjerovatnom brzinom od šejtana osobe koja je došla dotičnom sihirbazu, što izaziva divljenje ljudi u pogledu dotičnog sihirbaza i njegove moći. Međutim, da bi ovaj sihirbaz posjedovao takvu vrstu moći, mora uraditi stvari koje ruše njegovu vjeru, vjeru u Jednog Allaha, subhanehu ve te'ala, od kojih se kosa diže na glavi, da bi mu tek nakon njegovog nevjerovanja, taj isti džinn ili šejtan postao potčinjen (komuniciranjem sa džinnima i šejtanima, sihirbaz dolazi do određenih informacija o čovjeku koji mu dolazi, i upravo time kod naivaca zadobija povjerenje).

Poslanik Muhammed, sallallahu alejhi ve sellem, nije posjedovao znanje o nevidljivom svijetu, osim Allahovom voljom, putem meleka Džibrila, što jasno ukazuje da su za to odabrani samo posebni ljudi (poslanici), kojima je dolazila objava od Uzvišenog Gospodara. Otuda, svaki onaj koji tvrdi da posjeduje znanje o gajbu – veliki je lažac (dedžal). Naš Gospodar je kazao za poslanika, Muhammeda, alejhisselam, u svojoj plemenitoj Knjizi: "Reci: 'Ja ne mogu ni samom sebi neku korist pribaviti, ni od sebe kakvu štetu otkloniti; biva onako kako Allah hoće. A da znam nevidljivo, stekao bih mnoga dobra, a zlo bi bilo daleko od mene; ja samo donosim opomene i radosne vijesti ljudima koji vjeruju.'" (Prijevod značenja El-A'raf, 188.)

Što se tiče Turabijeve varke da to čini besplatno, sugeriramo da razumni razmisle o sljedećim činjenicama: Koliko šlepera flaširane vode dnevno proda Sarajevska pivara, koliko se zaradi na ulaznicama, koliko za parking, ko stoji iza potpisanih ugovora između dvorane Zetra i onih koji profitiraju? Sama činjenica da svakoj osobi poručuje da treba da dolazi svaki dan – a broj se svakodnevno povećava (prije nekoliko dana mediji su prenijeli informaciju da ga je posjetilo 25.000 ljudi), upućuje na ogromnu zaradu, a sami procijenite kome idu pare!

Žalosno je da danas ljudi koje je Uzvišeni Allah odlikovao nad ostalim stvorenjima podarivši im pamet, izigravaju umno zaostale osobe odobravajući i odazivajući se na Turabijeve "medicinske seanse". Zar je moguće da se pametna i razumna osoba dovede u situaciju da ode kod tog "bolesnika" i kaže: "Molim te, osjećam zamor, bol, otkloni to od mene", ili da, iako je zdrava, traži zaštitu od bolesti u budućnosti, a Turabi posebnim dodirom otkloni sve probleme hiljadama ljudi?!

Svaka pametna osoba smatrat će ovo "liječenje" jednom običnom lakrdijom i na sve načine udaljiti će se i ograditi od ovakvih kvaziiscjelitelja, jer normalnoj i pametnoj osobi, a prije svega vjerniku u Allaha Uzvišenog, uopće ne dolikuje da odlazi na takva mjesta. Islamski učenjaci iz Maroka i arapskih zemalja ogradili su se od Turabijevog načina liječenja i nazvali ga prevarantom i sihribazom, ujedno zabranjujući odlazak njemu zbog liječenja.

Na kraju ćemo navesti još jednu veliku obmanu i prevaru Mekkijsa Turabija, u koju smo se lično uvjerali.

Naime, dječak koji je došao kod Turabija u invalidskim kolicima, Alen Cufaj, vjerovatno poznat svima iz medija, na čudo svih prisutnih, navodno po prvi put ustaje iz kolica. Majka ushićena vrišti od sreće, tvrdeći da prvi put ustaje i hoda uz njenu pomoć!!! To je jedan od najvećih dokaza da Turabi čini "čuda". Majka dječaka Alena Cufaja, koji je u tom trenutku ustao iz kolica, javno tvdi da Alen prije toga nije hodao, niti je imao tretmane u Fojnici i sl.

Međutim, šta je istina? Dječak Alen Cufaj odavno je poznat terapeutima na sarajevskoj Pedijatriji – gdje je dolazio na fizikalnu terapiju – koji odgovorno tvrde da Alen, na isti ovaj način koji su ljudi imali priliku vidjeti, hoda već pet godina, a također je bio na rehabilitaciji u Fojnici tri puta, i zgražavaju se nad činjenicom da neko može izvesti takvu prevaru! Allahu ekber, koje laži i obmane od strane Turabija, kojima je asistirala i dječakova majka!

Kakvu korist ima ovaj dječak i njegova majka? Turabi je obećao da će dijete imati besplatan tretman kod njega u Maroku. Kakvu korist od toga ima Turabi? Suvišno je i kazati da će ovaj dječak biti primjer kako on "diže na noge čak i osobe iz kolica", kako čuda pravi, dakle, bit će najbolji vid reklame za njegovo djelo.

Naš Gospodar kazao je u Kur'anu: "I reci: 'Došla je istina, a nestalo je laži; laž, zaista, nestaje!'" (Prijevod značenja El-Isra, 81.)

Kako Turabijeve terapije predstavljaju očigledni sihr, vradžbinu i šejtanski posao, neophodno je upozoriti na opasnost podvrgavanja takvom načinu "liječenja" i s tim u vezi navesti dvije predaje našeg Poslanika, alejhis-selam, koji kaže: "Ko ode gataru, pa ga pita o nečemu, neće mu biti primljen namaz 40 dana" (Muslim); "Ko dođe gataru, pa povjeruje u ono što govori, takav je zanijekao ono što je objavljeno Muhammedu, sallallahu alejhi ve sellem." (Ebu Davud)

Molim Allaha da naš narod uputi na Pravi put, da nam istinu pokaže istinom, pa da je slijedimo, a zabludu zabludom, pa da se klonimo njenih tmina! Amin!

ISTINA O MAROKANSKOM
"ISCJELITELJU"

Mekkijsa
Turabiju